

KONTROL MOZIOA

KALE GARBIKETAKO UDAL ZERBITZUEK SORTUTAKO KUTSADURA AKUSTIKOAREN ARLOAN INDARREAN DAGOEN ARAUDIA EZ BETETZEARI BURUZKOA

Jon Markel Ormazabal Gaztañagak, EH BILDU udal taldeko zinegotziak, Udalbatzaren Organo Araudiko 98. artikulua oinarri, **kontrol mozio** hau aurkezten du, Udalbatzan azter dadin. Mozioa 2024ko abenduko Pertsonentzako Zerbitzuen Batzordean aztertutako interpelazioaren ondorioa da.

JUSTIFIKAZIOA

Donostiako erdiguneko bizilagunek urteak daramatzate beren ongizatea kaltetzen duten zarata-mailak jasaten, kaleak garbitzeko udal-zerbitzuek eragindakoak. Aspalditik ari dira horretaz kexatzen bizilagunak, eta Arartekoarengana ere jo dute hainbat aldiz. Arartekoak, bestalde, bi ebazpen eman ditu, Donostiako Udalari kaleak garbitzeko zerbitzuak eragindako kutsadura akustikoari aurre egiteko premiazko neurriak har ditzala eskatzeko.

2016IR-1753-15 Ebazpena, 2016ko abenduaren 15ekoa: Arartekoak Udalari eskatu zion garbiketa-makinetan zarata-neurketak egiteko eta indarrean dagoen araudia betetzeko eta bizilagunen oinarritzko eskubideak bermatzeko beharrezko neurri zuzentzaileak hartzeko.

2024IR-1268-23 Ebazpena, 2024ko irailaren 10ekoa: Arartekoak Udalari eskatu zion beharrezko neurriak har zitzala araudia salbuespenik gabe betetzeko eta alde zuzenetik bete gabeko konpromisoei erantzuteko.

Egoeraz jabetuta, eta bizilagunen kexak areagotzen ari zirela ohartarazita, joan den abenduan interpelazio bat aurkeztu genuen. Zinegotzi ordezkariak erantzun zuen egoeraren

berri zuela eta Udala neurriak hartzen hasi zela. Besteak beste, adierazi zuen garbiketa-kontratu berrian jasotako ibilgailu elektrikoez gain, zarata gutxiago sortuko dutenak, erdialdeko garbiketari esleitutako zerbitzu batzuk murriztea onartu zela, hau da, pleguetan maiztasun berriak sartu zirela.

Aldaketa horiei buruz ere galdetu genuen aurtengo urtarrilean, eta zinegotzi ordezkariak erantzun zuen maiztasuna astean zazpi egunetik seira murriztu zela gaueko ordutegian, nahiz eta asteko zein egunetan zehaztu gabe.

Baina erdiguneko bizilagunen artean udalarekiko mesfidantza da nagusi. Eta ez zaie horretarako arrazoirik falta. 2016ko uztailaren 5ean, Donostiako Udalak Arartekoari jakinarazi zion garbiketa-zerbitzu berri bat kontratatuko zuela, eta, kontratuaren esleipenean, makinen zarata murrizteko eta ingurumen-araudia betetzeko helburua nabarmendu zen. Bederatzi urte geroago, ordea, arazoak bere horretan jarraitzen du. Ingurumen Sailak eta Hiri Mantentze-lanetako arduradunek ere onartu dute zarata-mailek emisio-mugak gainditzen jarraitzen dutela, baita jarduketa horiek behar bezala ebaluatu ez direla ere. Gainera, eta bizilagunek berek ongi adierazi bezala, Soinu Ingurua Hobetzeko Ekintza Plan berriak ez ditu udal-garbiketako jarduerak zarata-iturritzat hartzen, eta, beraz, ez du ekintza espezifikorik aurreikusten arazo horri aurre egiteko.

Horren berri eta gehiago ematen du Erdian Bizi auzo elkarteak Udalbatza osatzen dugun talde politiko guztiei bidalitako idatziak. Eta, hain zuzen ere, idazki horretan Udalari egiten dioten errekerimendua da gaur hona mozio gisa ekarri duguna.

Horiek horrela, eta erdialdeko bizilagunen eskariei erantzunez, honako hau da behean sinatzen duen zinegotziak aurkeztutako **KONTROL MOZIOA**:

1.- Donostiako Udalbatzak hertsatuki eskatzen dio Udal Gobernuari garbiketa-makinek eta hondakinak biltzeko lanek sortutako zarataren benetako inpaktua ebaluatzeko beharrezko neurketa akustikoak egitea. Izan ere, hori egin gabe ezin da esku-hartze eraginkorrik ezarri, ezta hartutako neurri zuzentzaileak betetzen direla kontrolatu eta denboran zehar horien eraginkortasuna zaindu ere.

2.- Donostiako Udalbatzak hertsatuki eskatzen dio Udal Gobernuari, neurri zuzentzaileak hartu eta zarata-mailak murrizteko ekintza eraginkorrak aplika ditzala, araudian ezarritako mugetara egokituz eta, horrela, udal-jarduketek herritarren bizi-kalitatea errespetatzen dutela bermatuz.



EH Bildu talde politikoa

Grupo político EH Bildu



Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

3.- Donostiako Udalbatzak hertsatuki eskatzen dio Udal Gobernuari, kaltetutako bizilagunekin elkarrizketa aktiboa ziurtatze aldera, komunikazio-gune iraunkor eta eraikitzaile bat ireki dezala arazoaren konponbidea arintzeko eta hartutako neurriak ebaluatzeko.

Donostian, 2025eko apirilaren 24ean

Jon Markel Ormazabal Gaztañaga

EH Bildu udal taldeko zinegotzia